

Gveiqva Rang Vunzguek Angq

□Vangz Haijven/黄海燕

Cib nyied seizcou, gwnz gai venj rim geizhoengz, dauqcawq hoengzfwgfwg, dauqcawq angqvauvau.

Cib nyied it hauh, dou caeuq daengx guek ciencien fanhfanh hoh beksingq ityiengh angqcoux ngoenzseng guekcoj daxmeh raeuz.

Banngoenz dou daengx ranz vunz byaij youq gwnz haw, hai da couh yawjraen gij geizhoengz baek rim song henz gai haenx nyig rumz biyagyag, lumj raemxlangh ndinghoengz nei, cang diuz gai bienq ndaej moqsagsag.

Banhaemh, dou daengx ranz vunz guhdoiha daengz gvangjcanz bae guhcaemz, ndaw gvangjcanz senq gyonjcomz rim vunz, gyae’ gyae couh dingqnyi gij sing go 《Fwen Haenh Guekcoj》 habciengq ndei dingq haenx cienz daeuj, aen gvangjcanz lumj aen haij angqyangz nei:

Geizhoengz Haj Sing nyig rumz mbinfouz, Singfwen hoenxhingz baenzde goksat,

Fwen haenh guekcoj ndiepgyaez duh raeuz, Ngoenz hwnj byaijcoh fanzyungz fouqgiengz……

Hot go sugrwz neix, hawj gyoengqvunz mbouj rox mbouj nyinh dwk gaen ciengq hwnjdaeuj. Gou byaij gvaqbae yawj, laxlawz dwg bang daxau caeuq bang daxheiz ndeu cingq ciengqgo.

Gou byaij daengz gyang gvangjcanz, raen gwnz daizheiq miz vunz yienjheiq: Miz daxheiz daenj vinj hoengz diuqfoux, miz lwghag langh sing doeg sei, lij miz lwghag ciengq go. 《Guekcoj Gou Caeuq Gou》 hot go neix yiengj seiz, gyoengqvunz cungj gaen ciengq, gij geizva henz loh hix gaen rumz biufefe.

“Mehgux, ciet gozging vihmaz aeu cuengqgyaj caet ngoenz?” Lansau haj bi haenx ngiengx gyaeuj cam gou.

Gou lumh gyaeuj de naeuz: “Ciet gozging dwg ngoenzseng guekcoj raeuz, couh caeuq raeuz moix bi

angqhoh ngoenzseng ityiengh. 76 bi gonq, Mauz cajsiz youq gwnz Denh’ anhmwnz gangj Cungguek moq laebbaenz, daj haenx hwnj cib nyied it hauh couh dwg ngoenzciet guekcoj raeuz. Raeuz ngoenzneix ndaej gwndaenj vuenyungz mbouj yungzheih, dwg daihbaj gwzming lezsw aeu mingh vuenh daeuj, raeuz aeu insik bw.”

Lansau dingq le ngaekngaek gyaeuj.

“Ciuj——bwnq!” Sing ndeu, bauqva youq gwnzmbwn sanqbyaengbyaeng lumj cienfanh naed ndaundei doek roengzdaeuj, vunzlai bekfwngz goksadsad, bouboux angqfwngfwng.

Youq gwnz roen ma ranz, rumzcou boq daeuj baenz raq baenz raq rang gveiqva, cim coh gij va henj iq venj rim gwnz nyefaex haenx, hawj gou lumj yawjraen gij gwndaenj daengx guek gizgiz cungj rang lumj gveiqva neix, sim gou soengswdswd, angq naeuz: “Hoh guekcoj hwnghvuenh fanhbi.”

Aen Gojgaeq Daxbuz Raezlanglang

□ Veiz Aicinh/韦爱珍

(ciep daih 3690 geiz)

Ndaw ranz lwg lai lan lai, saedcej gvaq ndaej gig haedndaet, hoeng daxbuz cungj miz fuengfap hawj dou roxnyinh “fouqcu”. Gou bae cunghconh doegsaw, moix bi yaek bae hagdangz seiz, de cungj guhcaeg heuh gou haeuj rugninz bae, mbe hai fwngz cocat de, conh geij mbaw ngaenz daeb ndaej cingcingj caezcaez okdaeuj, oet hawj gou: “Yo ndei, bae hagdangz aeu rox mbaet gwn mbaet yungh.” Geij mbaw ngaenz neix mbouj rox yo youq ndaw daeh de geijlai nanz, seiqhenz cungj muz dwk yungzyebyeb lo, lij loq daiq miz di raeujrubrub. Gou mbouj siengj aeu, de couh hozndat naeuz: “Nding ha, mwngz dwg lanmbwk daih gou, daxbuz doz ngaenz couh dwg hawj mwngz yungh la, yo ndei bo!” Gvaqlaeng gou cij rox, gijneix dwg daxbuz hwnzngoenz daemjrok mbaet roengzdaeuj cienmonz diem caj gou, caet boux lwg, bouboux lwglan cungj ndaej daxbuz yienghneix “caegcaeg biensim”.

Daxbuz baenzciuh mbouj caengz ok dou bae gyae gvaq, cix dawz saedcej gungzhoj neix gvaq baenz sei. Ndaw suenbyaek gij lwggva、duhseiq cungj dwg de caenfwnz ndaem, gaeugva railh hwnj bangx suen heurwdrwd, daengz seizcou venj rim lwggva luenzlulu, de couh genj aen ceiq hung roengzdaeuj, guh cuk namzgva、bingj namzgva, heiq hom biu daengx mbanj. De ciengzciengz gangj: “Swhgeij gag ndaem, gwn caengj van.” Mwhhaenx gou mbouj rox, seizneix cij roxyiuj, gij heiqhom de, yo rim gij maqmuengh daxbuz——Dajdingh

ndwenngoenz caiq hoj, de lij dwk ndaem ceh maqmuengh roengz namh, youq ndaw gojgaeq de hai va baenz mak.

Daxbuz riu seiz, gaeu da nyup baenz dujva, gokbak miz di yaengx hwnj, loh ok baiz heujgyaj cingjaez de okdaeuj. Ndaw mbanj miz vunz naeuz de “mingh hoj”, ganq ndaej caet boux lwg saedcej hoj lai, de vadvad fwngz: “Hoj maz? Yawj sou bouboux majhung baenz ranz, seizneix youh miz gyoengq lan dem, baenz seiq daih doengz dangz lo, ndaw sim gou van lumj diengzrwi.” Gaxgonq de cungj siengj hawj gij doxgaiq ndei hawj boubwnq: Miz baengz moq guh buhvaq hawj lwg hawj lan; daemjrok guh gaen’ gyaeuj bae haw gai, cawx gyu dauqma ranz; de swhgeij mbaet gwn mbaet yungh, daenj geubuh gwnzndang fong bae fong dauq, raen dou gwn ndaej van seiz, cix dwg riunyumnyum, lumjnaeuz de hix ndaej gwn nei.

Seizneix aen daemjrok daxbuz gaenq youq gungx saedcej de caemrwg, gwnzde goemq rim namhfaenx; gyaeuj mbanj golex geq hix didnyez lo. Moix baez baema ranz, byaij youq gwnz haenznaz, dingq daengz sing lingz duzvaiz daj gyae cienz daeuj, roxnaeuz heiq hom cuk namzgva, doiqnaj cungj yienh’ ok aen ngaenz ndang sang eu ndeu——De mauq youq gwnz haenznaz, ndaw fwngz dawz diuz bien fad vaiz, gyoengq lwgnyez lumj duzroeg lwg cici caca homh youq henzndang de, gojgaeq gangj daengz buenq, sawqmwh ngiengx gyaeuj hwnjdaeuj,

yawjyawj aen daengngoenz din mbwn yaek doek roengz bya haenx.

Daxbuz a, gou lij caegcaeg laemxsim: Caj gou baenz ranz baenz gya le, gou yaek aeu ndeindei hauqgingq mwngz, aenvih gou dwg lan mbwk daih mwngz. Hoeng mwngz caj mbouj daengz ngoenz neix, “faex yaek caem rumz mbouj dingz, lwg yaek ciengx boh mbouj youq.” Neix hawj gou louz ienqhoij lai lo. Mwngz lizgyae dou ndaej cib bi lo, cix roxnyinh mwngz coengzlaiz mbouj caengz bae gyae, gojgaeq mwngz、fwngz raeujrub mwngz、aen daeh caegcaeg cang ngaenzlingz mwngz, caeux couh sanq

haeuj ndaw mingh gou. Couh lumj mwngz gangj, vunz ndei rox bienq baenz ndaundeiq, hoeng gou rox, mwngz engq lumj gofaex hung rag raez ndeu, iet mbaw nye bae gyae, bang gyoengq lwgnyez lanz rumz dangj fwn. Nyienh mwngz youq gwnzmbwn vanzlij riunyumnyum, laebdaeb gangj aen gojgaeq gangj mbouj sat mwngz——Gou haeujsim yo aen geiq neix hwnjdaeuj, lumj gaxgonq mwngz yo ngaenzlingz nei, yo youq giz saedcej ceiq laeg de, hawj de ciengxlwenx raeujrub, ciengxlwenx fatrongh.

(2 sat)

